

四庫全書

史部

欽定四庫全書

水經注釋卷二十一

仁和趙一清撰

汝水

汝水出河南梁縣勉鄉西天息山

地理志曰出高陵山即猛山也亦言出南陽魯陽縣之大孟山又言出宏農盧氏縣還歸山博物志曰汝出燕泉山並異名也余以永平中蒙除魯陽太守會

上臺下列山川圖以方誌參差遂令尋其源流此等  
既非學徒難以取悉既在遘見不容不述今汝水西  
出魯陽縣之大孟山蒙柏谷巖郭深高山岫邃密石  
徑崎嶇人蹟裁交西即盧氏界也其水東北流逕太  
和城西又東流逕其城北左右深松列植筠柏交蔭  
尹公度之所棲神處也又東屆堯山西嶺下水流兩  
分一水東逕堯山南為瀘水也即經所言瀘水出堯  
山矣一水東北出為汝水歷蒙柏谷左右岫壑爭深

山阜競高夾水層松茂柏傾山蔭渚故世人以名也  
津流不已北歷長白沙口狐白谿水注之夾岸沙漲  
若雪因以取名其水南出狐白川北流注汝汝水又  
東北趣狼臯山者也

東南過其縣北

汝水自狼臯山東出峽謂之汝阨也東歷麻解城北  
故鄆鄉城也謂之蠻中左傳所謂單浮餘圍蠻氏蠻  
氏潰者也杜預曰城在河南新城縣之東南伊洛之

戎陸渾蠻氏城也俗以爲麻解城非也蓋蠻麻讀聲近故也汝水又逕周平城南京相璠曰霍陽山在周平城東南者也汝水又東與三屯谷水合水出南山北流逕石碣東柱側刊云河南界又有一碣題言洛陽南界碑柱相對既無年月竟不知何代所表也其水又北流注于汝水汝水又東與廣成澤水合水出狼臯山北澤中安帝永初元年以廣成遊獵地假與貧民元初二年鄧太后臨朝鄧騭兄弟輔政世士以

為文德可興武功宜廢寢蒐狩之禮息戰陣之法于  
時馬融以文武之道聖賢不墜五材之用無或可廢  
作廣成頌云大漢之初基也揆厥靈囿營于南郊右  
脅三塗左枕嵩嶽面據衡陰背基王屋浸以波濊演  
以滎洛金山石林殷起乎其中神泉側出丹水涅池  
怪石浮磬耀焜于其陂桓帝延熹元帝校獵廣成遂  
幸函谷關其水自澤東南流逕溫泉南與溫泉水合  
溫水殷源揚波于川左泉上華宇連蔭茂薨交拒方

塘石沼錯落其間頤道者多歸之其水東南流注廣  
成澤水澤水又東南入于汝水汝水又東得魯公水  
口水上承陽人城東魯公陂城古梁之陽人聚也秦  
滅東周徙其君於此陂水東南流合于澗水水出北  
山南流注之又亂流注于汝水汝水之右有霍陽聚  
汝水逕其北東合霍陽山水水出南山杜預曰河南  
梁縣有霍山者也其水東北流逕霍陽聚東世謂之  
華浮城

一清按章懷後漢書注曰俗謂之張侯城

非也春秋左傳哀公四

年楚侵梁及霍服虔曰梁霍周南鄙也建武二年世

祖遣征虜將軍祭遵攻蠻中山賊張滿時厭新柏華

餘賊合攻得霍陽聚即此

一新清按後漢書祭遵傳時新城蠻中山賊張滿屯結

險隘為人害詔遵攻之而厭新柏華餘賊復與滿合遂攻得霍陽聚遵元抄變其詞耳

水又逕

梁城西按春秋周小邑也於戰國為南梁矣故經云

汝水逕其縣北俗謂之治城非也以北有注城故也

今置治城縣治霍陽山水又東北流注于汝水汝水

又右合三里水水北出梁縣西北而東南流逕其縣



故城西故愚狐聚也地理志云秦滅西周徙其君于此因乃縣之杜預曰河南縣西南有梁城即是縣也水又東南逕注城南司馬彪曰河南梁縣有注城史記魏文侯三十一年敗秦于注者也又與一水合水發注城東坂下東南流注三里水三里水又亂流入于汝汝水又東逕成安縣故城北按地理志潁川郡有成安縣侯國也史記建元以來功臣侯者年表曰漢武帝元朔五年校尉韓千秋擊南越死封其子韓

延年為成安侯即此邑矣世謂之白泉城非也俗謬耳汝水又東為周公渡藉承休之徽號而有周公之嘉稱也汝水又東黃水注之水出梁山東南逕周承休縣故城東為承休水縣故子南國也漢武帝元鼎四年幸雒陽巡省豫州觀于周室邈而無祀詢問耆老乃得尊子嘉封為周子南君以奉周祀按汲冢古文謂衛將軍文子為子南彌牟其後有子南勁紀年勁朝于魏後惠成王如衛命子南為侯秦并六國衛

最後滅疑嘉是衛後故氏子南而稱君也初元五年為周承休邑地理志曰侯國也元帝置元始二年更

曰鄭公

一清按漢書地理志亦作鄭公而後漢黃瓊封邠鄉侯章懷注引說文曰邠邠川縣也漢

邠川郡有周承休侯國元始二年更名曰邠王莽之音亢袁紹亦封邠鄉侯此云鄭公不詳其故

嘉美也故汝渡有周公之名蓋藉邑以納稱也世謂

之黃城水曰黃水皆非也其水又東南逕白茅臺東

又南逕梁雀鄉西世謂之期城非也按後漢書世祖

自邠川往梁雀鄉馮魴先詣行所即是邑也

一清按方輿紀

要云括地志周承休城一名梁雀塢或云即梁瞿鄉也蓋瞿雀字形相似道元以世謂之期城為非期瞿音

相似然則雀字為正水積為陂世謂之黃陂東轉逕其城南東

### 流右合汝水

### 又東南過潁川郟縣南

汝水又東與張磨泉合水發北阜春夏水盛則南注汝水汝水又東分為西長湖湖水南北五十餘步東西三百步汝水又東扈澗水北出大劉山南逕木蓼堆東郟城西南流入于汝汝水又右迤為湖湖水南

北八九十步東西四百步俗謂之東長湖湖水下入汝古養水也水出魯陽縣北將孤山北長岡下數泉俱發東歷永仁三堆南又東逕沙川世謂之沙水歷山符壘北又東逕沙亭南故養陰里也司馬彪郡國志曰襄城有養陰里京相璠曰在襄城郟縣西南養水名也俗以是水為沙水故亦名之為沙城非也又城處水之陽而以陰為稱更用惑焉但流雜間居裂漑牙移致令川渠異容津途改狀故物望疑焉又

右會堇溝水水出沛公壘西六十許步蓋漢祖入關  
往征是由故地擅斯目矣其水東北注養養水又東  
北入東長湖亂流注汝水也汝水又逕邾縣故城南  
春秋昭公十九年楚令尹子瑕之所城也激水注之

水出魯陽縣之將孤山東南流許慎云水出南陽魯

陽入父城從水教聲

一清按說文云入城父蓋道元改之

呂忱字林亦

言在魯陽激水東入父城縣與桓水會桓水出魯陽  
北山水有二源竒導於賈復城合為一瀆逕賈復城

北復南擊郾所築也俗語訛謬謂之寡婦城水曰寡婦水此瀆水有窮通故有枯渠之稱焉其水東北流至父城縣北右注潁水亂流又東北至郾入汝汝水東南左合藍水水出陽翟縣重嶺山東南流逕紀氏城西有層臺謂之紀氏臺續漢書曰世祖車駕西征盜賊羣起郾令馮魴為賊延褒所攻力屈上詣紀氏羣賊自降即是處在郾城東北十餘里其水又東南流逕黃阜東而南入汝水汝水又東南流右與白溝

水合水出夏亭城西又南逕龍城西城西北即摩陂也縱廣可一十五里魏青龍元年有龍見于邾之摩陂明帝幸陂觀龍於是改摩陂曰龍陂其城曰龍城其水又南入于汝水汝水又東南與龍山水會水出龍山龍溪北流際父城縣故城東昔楚平王大城城父以居太子建故杜預曰即褒城之城父縣也馮異據之以降世祖用報巾車之恩也

一清按城父父城本是二縣漢志潁

川郡父城縣下云應鄉故國沛郡城父縣下云夏肥水東南至下蔡入淮蘇曰思善績志父城屬潁川而



城父改隸汝南故特著曰城父故屬沛春秋時曰夷左氏傳云楚遷許于夷實城父杜預註曰此時改城父為夷故傳實之又後漢書馮異傳云潁川父城人也韋懷注云父城縣名故城在今許州葉縣東北汝川郟城縣有父城亦或謂之城父元和郡縣志云父城故殷時應國左傳楚大城城父以居太子建是也杜元凱恐後人誤以此城父為遷許之舊故云即襄城之城父明以別于沛郡也史記正義云潁川父城縣沛郡城父縣據郡屬縣其名自分斯言最核也

其水又東北流與二水合

俱出龍山北流注之又東北入于汝水汝水又東南

逕襄城縣故城南王隱晉書地道記曰楚靈王築劉

向說苑曰襄城君始封之日服翠衣帶玉佩徒倚于

流水之上即是水也楚大夫莊辛所說處後乃縣之  
呂后元年立孝惠後宮子義為侯國王莽更名相城  
也黃帝嘗遇牧童於其野故嵇叔夜讚曰奇矣難測  
襄城小童倦遊六合來憩茲邦也其城南對汜城周  
襄王出鄭居汜即是此城也春秋襄公二十六年楚  
伐鄭涉汜而歸杜預曰涉汝水于汜城下也晉襄城  
郡治京相璠曰周襄王居之故曰襄城也今置關于  
其下汝水又東南流逕西不羹城南春秋左傳昭公

十二年楚靈王曰昔諸侯遠我而畏晉今我大城陳蔡不羹賦皆千乘諸侯其畏我乎東觀漢記曰車騎馬防以前參藥勤勞省閭增封侯國襄城羹亭二百五十戶即此亭也汝水又東南逕繁邱城南而東南出也

又東南過定陵縣北

湛水出犂縣北魚齒山西北東南流歷魚齒山下為湛浦方五十餘步春秋襄公十六年晉伐楚報楊梁

之役楚公子格及晉師戰于湛阪楚師敗績遂侵方  
城之外今水北悉枕翼山阜於父城東南湛水之北  
山有長阪蓋即湛水以名坂故有湛阪之名也湛水  
又東南逕蒲城北京相璠曰昆陽縣北有蒲城蒲城  
北有湛水者是也湛水又東於汝水九曲北東入汝  
杜預亦以是水為湛水矣周禮荊州其浸潁湛鄭元  
云未聞蓋偶有不照也今考地則不乖其土言水則

有符經文矣

一清按漢志註師古曰潁水出陽城陽  
乾山宜屬豫州許慎又云潁水豫州浸

蓋川上相隣故也全氏曰周禮職方荊州之浸潁潁按潁是汝水支流而潁亦與汝互相出入之水也又豫州之浸波潁波亦汝水支流然則汝雖不見于禹貢而未嘗不重于職方康成既不知潁水又不知波水非善長之註何以證明

汝水又東南逕定陵縣故城北漢成帝

元延三年封侍中衛尉淳于長為侯國王莽更之曰定城矣東觀漢記曰光武擊王莽二公逕到汝水止於涯以手飲水澡頰塵垢謂傳俊曰今日疲倦諸君寧憊也即是水也水右則潁水左入焉左則百尺溝出矣溝水夾岸層崇亦謂之為百尺隄也自定陵城

北通潁水於襄城縣潁盛則南播汝決則北注溝之  
東有澄潭號曰龍淵在汝北四里許南北百步東西  
二百步水至清深常不耗竭佳饒魚筍湖溢則東注  
潁水矣汝水又東南昆水注之水出魯陽縣唐山東  
南流逕昆陽縣故城西更始元年王莽徵天下能為  
兵法者選練武衛招募猛士旌旗輜重千里不絕又  
驅諸獷獸虎豹犀象之屬以助威武自秦漢出師之  
盛未嘗有也世祖以數千兵邀之陽關諸將見尋邑

兵盛反走入昆陽世祖乃使成國上公王鳳廷尉大將軍王常留守夜與十三騎出城南門收兵于郎尋邑圍城數十重雲車十餘大瞰臨城中積弩亂發矢下如雨城中人負戶而汲王鳳請降不許世祖率營部俱進頻破之乘勝以敢死三千人徑衝尋邑兵敗其中堅于是水之上遂殺王尋城中亦鼓譟而出中外合勢震呼動天地會大雷風屋瓦皆飛莽兵大潰昆水又屈逕其城南世祖建武中封侍中傅俊為侯

國故後漢郡國志有昆陽縣蓋藉水以氏縣也

按一清漢

志潁川郡昆陽縣應劭曰昆水出南陽

昆水又東逕定陵城南又東注

汝水汝水又東南逕奇額城西北今南潁川郡治也

瀆水出焉世亦謂之大瀝水爾雅曰河有雍汝有瀆

然則瀆者汝別也

全氏曰公羊子曰瀆泉者直泉也直泉者涌泉也釋名本之其音讀

如瀝謂自下而上也瀝則其聲之轉也後表小瀝水下有汾陂善長亦曰汾俗音羹蓋汾即瀝之通也詩

曰遵彼汝墳蓋汝旁之水為瀆則汝旁之土亦為墳謂突起也如禹貢赤墳墳之墳毛公乃以大防解之

非矣觀孟子則汝水宜決不宜防也

故其下夾水之邑猶流汝陽之名



是或潰瀝之聲相近矣或下合瀝潁兼統厥稱耳  
又東南過鄆縣北

汝水逕竒頡城西東南流其城衿帶兩水側背雙流  
汝水又東南流逕鄆縣故城北故魏下邑也史記楚  
昭陽伐魏取鄆是也汝水又東得醴水口水出南陽  
雒縣亦云導源雒衡山即山海經云衡山也郭景純  
以為南嶽非也馬融廣成頌曰面據衡陰指謂是山  
在雒縣界故世謂之雒衡山依山海經不言有水焉

然醴水東流歷唐山下即高鳳所隱之山也醴水又  
東南與臯水合水發臯山郭景純曰或作章山東流  
注于醴水醴水又東南逕唐城北南入城而西流出  
城城蓋因山以即稱矣醴水又屈而東南流逕葉縣  
故城北春秋昭公十五年許遷于葉者也楚盛周衰  
控霸南土欲爭強中國多築列城于北方以逼華夏  
故號此城為萬城或作方城唐勒奏土論曰我是楚  
也世霸南土自越以至葉垂宏境萬里故號曰萬城

也余按春秋屈完之在召陵對齊侯曰楚國方城以  
為城杜預曰方城山名也在葉南未詳孰是楚惠王  
以封諸梁子高號曰葉公城即子高之故邑也葉公  
好龍神龍下之河東王喬之為葉令也每月望常自  
詣朝堂帝怪其來數而不見車騎顯宗密令太史伺  
望之言其臨至輒有雙鳧從車南飛來於是候鳧至  
舉羅張之但得一隻鳧乃詔尚方診視則四年中所  
賜尚書官屬履也每當朝時葉門下鼓不擊自鳴聞

于京師後天下王棺于堂前吏民推排終不搖動喬  
曰天帝獨欲呂我耶乃沐浴服飾寢其中蓋便立覆  
宿昔葬于城東土自成墳其夕縣中牛皆流汗喘乏  
而人無知者百姓為立廟號葉君祠牧守每班錄皆  
先謁拜之吏民祈禱無不如應若有違犯亦立能為  
祟帝乃迎取其鼓置都亭下畧無復聲焉或云即古  
仙人王喬也是以干氏書之于神化醴水又逕其城  
東與燒車水合水西出苦菜山東流側葉城南而下

注醴水醴水又東逕葉公廟北廟前有葉公子高諸  
梁碑舊秦漢之世廟道有雙闕几筵黃巾之亂殘毀  
頽闕魏太和景初中令長修飾舊宇後長汝南陳晞  
以正始元年立碑碑宇破落遺文殆存事見其碑醴  
水又東與葉西陂水會縣南有方城山屈完所謂楚  
國方城以為城者也山有湧泉北流畜之以為陂陂  
塘方二里陂水散流又東逕葉城南而東北注醴水  
醴水又東注葉陂陂東西十里南北七里二陂並諸

梁之所竭也。陂水又東逕無陽縣故城北。又東逕定陵城南。東與芹溝水合。其水導源葉縣。東逕無陽城北。又東逕定陵縣南。又東南流注醴。其水逕流昆醴之間。纏絡四縣之中。疑即呂忱所謂覓水也。今於定陵更無別水。唯是水可當之。醴水東逕鄧縣故城南。

左入汝

一清按漢志南陽郡雋縣澧水東至鄧入汝。師古曰鄧音屋。考澧水東至鄧縣入汝。今河

南許州鄧城縣是也。鄧字誤耳。師古更以屋音釋之。廣韻集韻始出鄧字。云地名在南陽。皆為繆也。山海

經曰澧水東流注于覓水也。

一清按郭璞註云或曰視宜為覓。漢志南陽郡

舞陰縣瀕水所出東至上蔡入汝全氏曰山經所云瀋水注視瀋乃濯字之訛濯水注瀕瀋水不注瀕也

汝水又東南流逕鄧城西春秋左傳桓公二年蔡侯鄭伯會于鄧者也汝水又東南流瀋水注之

又東南過汝南上蔡縣西

汝南郡楚之別也漢高祖四年置王莽改郡曰汝潁一清按漢志汝南郡高帝置莽曰汝潁分為潁都尉縣故蔡國周武王克殷封

其弟叔度於蔡世本曰上蔡也九江有下蔡故稱上竹書紀年曰魏章率師及鄭師伐楚取上蔡者也永

初元年安帝封鄧隲為侯國汝水又東逕懸瓠城北  
王智深云汝南太守周矜起義於懸瓠者是矣今豫  
州刺史汝南郡治城之西北汝水枝別左出西北流  
又屈西東轉又西南會汝形若垂瓠耆彥云城北名  
馬灣中有地數頃上有栗園栗小殊不並固安之實  
也然歲貢三百石以充天府水渚即栗州也樹木高  
茂望若屯雲積氣矣林中有栗堂射埽甚閒敞牧宰  
及英彥多所遊薄其城上西北隅高祖以太和中幸



懸瓠平南王肅起高臺於小城建層樓于隅阿下際  
水湄降眺栗渚左右列榭四周參差競峙奇為佳觀  
也

又東南過平輿縣南

溱水出浮石嶺北青衣山亦謂之青衣水也東南逕  
朗陵縣故城西應劭曰西南有朗陵山縣以氏焉世  
祖建武中封城門校尉臧宮為侯國也溱水又南屈  
逕其縣南又東北逕北宜春縣故城北王莽更名之

為宣屏也豫章有宜春故加北矣元初三年安帝封

后父侍中閭暢為侯國溱水又東北逕馬香城北又

東北入汝汝水又東南逕平輿縣南安成縣故城北

王莽更名至成也漢武帝元光六年封長沙定王子

劉蒼為侯國矣

一清按索隱曰在豫章地理志豫章郡無此縣長沙國有安成縣非汝南

之安成也汝水又東南汶水首受慎水於慎陽縣故城南

陂

一清按漢志慎陽縣師古曰慎字本作滇音真陂關騶云永平五年失印更刻遂誤以水為心

水兩分一水自陂遶慎陽城四圍城塹潁川荀淑遇

縣人黃叔度於逆旅與語移日曰子吾師表也范爽  
論曰黃憲言論風旨無所傳聞然士君子見之者靡  
不服深遠去疵吝將以道周性全無得而稱乎塹水  
又自瀆東北流注北陂一水自陂東北流積為鰲陂  
陂水又東北又結而為陂世謂之窖陂陂水上承慎  
陽縣北陂東北流積而為土陂陂水又東為窖陂陂  
水又東南流注壁陂陂水又東北為太陂陂水又東  
入汝汝水又東南逕平陵亭北又東南逕陽遂鄉北

汝水又東逕櫟亭北春秋之棘櫟也杜預曰汝陰新

蔡縣東北有櫟亭今城在新蔡故城西北城北半淪

水汝水又東南逕新蔡縣故城南昔管蔡間王室放

蔡叔而遷之其子胡能率德易行周公舉之為魯卿

士以見于王王命之以蔡申呂地也以奉叔度祀是

為蔡仲矣宋忠曰故名其地為新蔡王莽所謂新遷

者七世祖建武元年封吳國為侯國

一清按後漢書吳漢傳國封在

建武二十八年汝南先賢傳曰新蔡鄭敬字次都為  
此云元年誤也

郡功曹都尉高懿廳事前有槐樹白露類甘露者懿問掾屬皆言是甘露敬獨曰明府政未能致甘露但樹汁耳懿不悅託疾而去汝水又東南左會潁水水上承汝水別流於奇頡城東東南流為練溝逕召陵縣西東南流注上蔡西岡北為黃陵陂陂水東流於上蔡岡東為蔡塘又東逕平輿縣故城南為潁水清一

按說文潁水出汝南上蔡潁間澗入汝

縣舊沈國也有沈亭春秋定公

四年蔡滅沈以沈子嘉歸後楚以為縣史記曰秦將

李信攻平輿敗之者也建武三十年世祖封姚統為

侯國

朱氏謀璋箋曰後漢書姚期傳子統封建平侯非平輿

本汝南郡治昔費

長房為市吏見王壺公縣壺郡市長房從之因而自  
遠同入此壺隱淪仙路骨謝懷靈無會而返雖能役  
使鬼神而終同物化城南里餘有神廟世謂之張明  
府祠水旱之不節則禱之廟前有圭碑文字齏碎不  
可復尋碑側有小石函按桂陽先賢畫譜臨武張熹  
字李智為平輿令時天大旱熹躬禱雩未獲嘉應乃

積柴自焚主簿侯崇小史張化從熹焚焉火既燎天  
靈感應即澍雨此熹自焚處也澹水又東南左迤為  
葛陂陂方數十里水物含靈多所苞育昔費長房投  
杖於陂而龍變所在也又劾東海君於是陂矣陂水  
東出為鮦水俗謂之三大陂亦曰三嚴水水逕鮦陽  
縣故城南應劭曰縣在鮦水之陽一清按漢志汝南郡鮦陽縣孟康曰  
音紂此是缺誤師古章懷音訓並承其失據太平案  
字記蔡州新蔡縣下云鮦音紂紅反說文鮦直龍切  
此與紂紅之音相近為可証也漢明帝永平中封衛尉陰興子慶為

侯國也縣有葛陵城建武十五年更封鉅侯鉅丹為

侯國

全氏曰丹以安徒封非鉅

城之東北有楚武王家民謂之

楚王琴

一清按皇覽曰民謂之楚王琴蓋山陵之異名城北祝社里下土中

得銅鼎銘曰楚武王是知武王隧也銅陂東注為富

水水積之處謂之陂塘津渠交絡枝布川隰矣潏水

自葛陂東南逕新蔡縣故城東而東南流注于汝水

又東南逕下桑里左迤為橫塘陂又東北為青陂者

也汝水又東南逕壺丘城北故陳地春秋左傳文公



九年楚侵陳剋壺丘以其服于晉是也汝水又東與青陂合水上承慎水于慎陽縣之上慎陂右溝北注馬城陂陂西有黃邱亭陂水又東逕新息亭北又東為網陂陂水又東逕新息縣結為牆陂陂水又東逕遂鄉東南而為壁陂又東為青陂陂東對大呂亭春秋外傳曰當成周者南有荆蠻申呂姜姓矣蔡平侯始封也西有小呂亭故此稱大也側陂南有青陂廟廟前有陂漢靈帝建寧三年新蔡長河南緱氏李言上

請修復青陂司徒臣訓尚書臣襲奏可洛陽宮於青  
陂東塘南樹碑碑稱青陂在縣坤地源起桐柏淮川  
別流入于潁潁逕新息牆陂衍入褒信界灌溉五百  
餘頃陂水又東分為二水一水南入淮一水東南逕  
白亭北又東逕吳城南史記楚惠王二年子西召太  
子建之子勝於吳勝入居之故曰吳城也又東北屈  
逕壺丘東而北流注于汝水世謂之薄谿水汝水又  
東逕褒信縣故城北而東注矣

又東至原鹿縣

汝水又東南逕原鹿縣故城西杜預釋地曰汝陰有  
原鹿縣也

南入于淮

所謂汝口側水有汝口戍淮汝之交會也

水經注釋卷二十一

欽定四庫全書

水經注釋卷二十二

仁和趙一清撰

潁水

洧水

潁水

潧水

渠水

潁水出潁川陽城縣西北少室山

秦始皇十七年滅韓以其地為潁川郡蓋因水以著稱者也漢高帝二年以為韓國王莽之左隊也山海

經曰潁水出少室山地理志曰出陽城縣陽乾山今  
潁水有三源竒發右水出陽乾山之潁谷春秋潁考  
叔為其封人其水東北流中水導源少室通阜東南  
流逕負黍亭東春秋定公六年鄭伐馮滑負黍者也  
馮敬通顯志賦曰求善卷之所在遇許由于負黍京  
相璠曰負黍在潁川陽城縣西南二十七里世謂之  
黃城也亦或謂是水為潁水東與右水合左水出少  
室南谿東合潁水故作者乃舉二三言水所發也呂

氏春秋曰卞隨恥受湯讓自投此水而死張顯逸民  
傳嵇叔夜高士傳並言投河水而死未知其孰是也  
又東南過其縣南

潁水又東五渡水注之其水導源崇高縣東北太室  
東谿縣漢武帝置以奉太室山俗謂之崧陽城及春  
夏雨泛水自山頂而迭相灌澍崦流相承為二十八  
浦也暘旱輟津而石潭不耗道路遊憩者唯得冷飲  
而已無敢澡盥其中苟不如法必數日不豫是以行

者憚之山下大澤周數里而清深肅潔水中有立石  
高十餘丈廣二十許步上甚平整縑素之士多泛舟  
昇陟取暢幽情其水東南流逕陽城西石溜縈委瀾  
者五涉故亦謂之五渡水東南流入潁水潁水逕其  
縣故城南昔舜禪禹禹避商均伯益避啟並於此也  
亦周公以土圭測日景處漢成帝永始元年封趙臨  
為侯國也

沈氏曰本表封成陽不封陽城成陽屬汝南不屬潁川

縣南對箕山

山上有許由冢堯所封也故太史公曰余登箕山之

上有許由墓焉山下有牽牛墟側潁水有犢泉是巢父還牛處也石上犢跡存焉又有許由廟碑闕尚存是漢潁川太守朱寵所立潁水逕其北東與龍淵水合其水導源龍淵東南流逕陽城北又東南入于潁潁水又東平洛谿水注之水發玉女臺下平洛澗世謂之平洛水呂忱所謂勺水出陽城山蓋斯水也又東南流注于潁潁水又東出陽關歷康亭城南魏明帝封尚書右僕射衛臻為康鄉侯此即臻封邑也



又東南過陽翟縣北

潁水東南流逕陽關聚夾水相對俗謂之東西二  
土城也潁水又逕上棘城西又屈逕其城南春秋左  
傳襄公十八年楚師伐鄭城上棘以涉潁者也縣西  
有故堰堰石崩禰頰基尚存舊遏潁水枝流所出也  
其故瀆東南逕三封山北今無水渠中又有泉流出  
焉時人謂之岵水東逕三封山東東南歷大陵西連  
山亦曰啟筮亭啟享神于大陵之上即鈞臺也春秋

左傳曰夏啟有鈞臺之饗是也杜預曰河南陽翟縣南有鈞臺其水又東南流水積為陂陂方十里俗謂之鈞臺陂蓋指鈞臺取名也又西南流逕夏亭城西又屈而東南為郊之摩陂潁水自竭東逕陽翟縣故城北夏禹始封于此為夏國故武王至周曰吾其有夏之居乎遂營洛邑徐廣曰河南陽城陽翟則夏地也春秋經書秋鄭伯突入于櫟左傳曰桓公十五年突殺檀伯而居之服虔曰檀伯鄭守櫟大夫櫟鄭之

大都宋忠曰今陽翟也周末韓景侯自新鄭徙都之  
王隱曰陽翟本櫟也故潁川郡治也城西有郭奉孝  
碑側水有九山祠碑叢柏猶茂北枕川流也

又東南過潁陽縣西又東南過潁陰縣西南

應劭曰縣在潁水之陽故邑氏之按東觀漢記漢封  
車騎將軍馬防為侯國防城門校尉位在九卿上絕  
席潁水又南逕潁鄉城西潁陰縣故城在東北舊許  
昌典農都尉治也後改為縣魏明帝封侍中辛毗為

侯國也潁水又東南逕柏祠曲東歷罡丘城南故汾  
丘城也春秋左傳襄公八年楚子庚治兵于汾司馬  
彪曰襄城縣有汾丘杜預曰在襄城縣之東北也逕  
繁昌故縣北曲蠡之繁陽亭也魏書國志曰文帝以  
漢獻帝延康元年行至曲蠡登壇受禪于是地改元  
黃初其年以潁陰之繁陽亭為繁昌縣城內有三臺  
時人謂之繁昌臺壇前有二碑昔魏文帝受禪于此  
自壇而降曰舜禹之事吾知之矣故其石銘曰遂于

繁昌築靈壇也於後其碑六字生金論者以為司馬  
金行故曹氏六世遷魏而事晉也潁水又東南流逕  
青陵亭城北北對青陵陂陂縱廣二十里潁水逕其  
北枝入為陂陂西則澍水注之水出襄城縣之邑城  
下東流注于陂陂水又東入臨潁縣之狼陂潁水又  
東南流而歷臨潁縣也

名勝志引水經注曰潁水又東逕秦龍城即古秦龍氏之

邑也城西有拒陵岡今本無之一清按案宇記云秦龍城在臨潁縣西四十里北周書秦企傳拒陽人杜窟即拒陵也古陽陵字每互用方輿紀要許臨川潁縣有大陵城引注文正同大陵見上陽翟縣及潁水注中

又東南過臨潁縣南又東南過汝南潁強縣北洧水從河南密縣東流注之

臨潁舊縣也潁水自縣西注小潁水出焉爾雅曰潁別為沙郭景純曰皆大水溢出別為小水之名也亦猶江別為沱也潁水又東南逕鞏城北即古鞏城亭矣春秋經書公及諸侯盟于鞏鼫者也鞏鞏字相似名與字垂耳潁水又東逕潁陽城南竹書紀年曰孫何取潁陽潁強城在東北潁水不得逕其北潁水又

東南潁水入焉非洧水也

又東過西華縣北

王莽更名之曰華望也有東故言西也世祖光武皇帝建武中封鄧晨為侯國漢濟北戴封字平仲為西華令遇天旱慨治功無感乃積柴坐其上以自焚火起而大雨暴至遠近歎伏永元十三年徵太常焉縣北有習陽城潁水逕其南也經所謂洧水流注之也

又東南女陽縣

縣故城南有汝水枝流故縣得厥稱矣闕駟曰本汝水別流其後枯竭號曰死汝水故其字無水余按汝女乃方俗之音故字隨讀改未必一如闕氏之說以窮通損字也潁水又東大潁水注之又東南逕博陽縣故城南城在南頓縣北四十里漢宣帝封邴吉為侯國王莽更名樂嘉

一清按漢志作樂家

又東南過南頓縣北潁水從西來流注之

潁水於樂嘉縣入潁不至于頓頓故頓子國也周之



同姓春秋僖公二十五年楚伐陳納頓子于頓是也  
俗謂之潁陰城非也潁水又東南逕陳縣南又東南  
左會交口者也

又東南至新陽縣北蕩蕩渠水從西北來注之

經云蕩蕩渠者百尺溝之別名也南合交口新溝自  
是東出潁上有堰謂之新陽堰俗謂之山陽堰非也  
新溝自潁北東出縣在水北故應劭曰縣在新水之  
陽今縣故城在東明潁水不出其北蓋經誤耳潁水

自堰東南流逕項縣故城北春秋僖公十七年魯滅  
項是矣潁水又東右合谷水水上承平鄉諸陂東北  
逕南頓縣故城南側城東注春秋左傳所謂頓迫于  
陳而奔楚自頓徙南故曰南頓也今其城在頓南三  
十餘里又東逕項城中楚襄王所郭以為別都都內  
西南小城項縣故城也舊潁州治谷水逕小城北又  
東逕魏豫州刺史賈逵祠北王隱言祠在城北非也  
廟在小城東昔王凌為宣王司馬懿

一清按三字注中執

屈廟而嘆曰賈梁道王凌魏之忠臣唯汝有靈知之  
遂仰鴆而死廟前有碑碑石生金干寶曰黃金可採  
為晉中興之瑞谷水又東流出城東注潁潁水東側  
有公路城袁術所築也故世因以術字名城矣潁水  
又東逕臨潁城北城臨水闕南面又東逕雲陽二城  
間南北翼水並非所具又東逕丘頭丘頭南枕水魏  
書國志曰宣王軍次丘頭王凌面縛水次故號武丘  
矣庾林曰司馬懿雖嘗討王凌至丘頭而武丘之名則至司馬昭克諸葛誕始改本注誤矣潁水

又東南流於故城北細水注之

一清按細水說文作洧从水洧聲

水

上承陽都陂陂水枝分東南出為細水東逕新陽縣故城北又東南逕宋縣故城北縣即所謂鄆丘者也秦伐魏取鄆丘謂是邑矣漢成帝綏和元年詔封殷後于沛以存三統平帝元始四年改曰宋公章帝建初四年徙邑於此故號新鄆為宋公國也王莽之新延矣細水又南逕細陽縣新溝水注之新溝水首受交口東北逕新陽縣故城南漢高帝六年封呂青為

侯國也莽更名曰新明也故應劭曰縣在新水之陽  
今無水故渠舊道而已東入澤渚而散流入細細水  
又東南逕細陽縣故城南王莽更之曰樂慶也世祖  
建武中封岑彭子遵為侯國細水又東南積而為陂  
謂之次塘公私引裂以供田溉又東南流屈而西南  
入潁地理志曰細水出細陽縣東南入潁

漢一清按今  
志無是

文師古曰居細水之陽故  
曰細陽細水本出新鄣

潁水又東南流逕胡城東

故胡子國也春秋定公十五年楚滅胡以胡子豹歸

是也杜預釋地曰女陰縣西北有胡城也潁水又東  
南汝水枝津注之水上承汝水別瀆于奇額城東三  
十里世謂之大潁水也東南逕召陵縣故城南春秋  
左傳僖公四年齊桓公師於召陵責楚貢不入即此  
處也城內有大井徑數丈水至清深闊駟曰召者高  
也其地丘墟井深數丈故以名焉又東南逕征羌縣  
故召陵縣之安陵鄉安陵亭也世祖建武十一年以  
封中郎將來歆歆以征定西羌功故更名征羌也

清

按後漢書來歙傳云以歙有平羌隴之功故改汝南之當鄉縣為征羌國焉漢志汝南郡無此縣名續志云汝南郡召陵縣有安陵鄉征羌侯國有安陵亭與酈注合本傳之云所未詳也 關駟引戰

國策以為秦昭王欲易地謂此也一清按地理志偶陵李奇曰六國為

安陵在潁川不在汝南 汝水別瀆又東逕西門城即南利也

步袁術所築也汝水別瀆又東逕西門城即南利也

漢宣帝封廣陵厲王子劉昌為侯國縣北三十里有

孰城號曰北利故瀆出于二利之間間闕女陽之縣

世名之曰死汝縣取水名故曰女陽也又東逕南頓

縣故城北又東南逕鮦陽城北又東逕郢鄉城北又

東逕固始縣故城北地理志縣故寧也寧丘在南故

藉丘名縣矣

全氏曰按漢志汝南郡有寧縣應劭以爲寧丘淮陽國有固始縣顏師古又以

爲寧丘故劉奉世疑之曰既別有固始則此寧疑更一地予謂非也淮陽之固始與寧本一地而分爲二

縣漢王追項羽至固陵晉灼曰即固始也師古曰後改爲固始耳地理志屬淮陽續志光武改寧爲固始

而淮陽之固始則并省陳之陽夏故陽夏有固陵聚劉昭補注引晉灼云汝南固始縣以實之則二縣本

相接也又何疑乎寧之更是一地乎但今王莽更名漢志則無固始故寧之文未知所據也

之曰閏治孫叔敖以土浸薄取而爲封故能繇嗣城



北猶有叔教碑建武二年司空李通又慕叔教受邑  
故光武以嘉之更名固始別汝又東逕蔡岡北岡上  
有平陽侯相蔡昭家昭字叔明周后稷之冑冢有石  
闕闕前有二碑碑字淪碎不可復識羊虎傾低殆存  
而已枝汝又東北流逕胡城南而東歷女陰縣故城  
西北東入潁水潁水又東逕女陰縣故城北史記高  
祖功臣侯者年表曰高祖六年封夏侯嬰為侯國王  
莽更名之曰汝墳也縣在汝水之陰故以汝水納稱

城西有一城故陶丘鄉也汝陰郡治

全氏曰晉志汝陰郡魏置首汝

陰縣後魏志汝陰郡晉武帝置治社亭城

城外東北隅有舊臺翼城若丘

俗謂之女郎臺雖經顛毀猶自廣崇上有一井疑故陶丘鄉所未詳

又東南至慎縣東南入于淮

潁水東南流左合上吳百尺二水俱承次塘細陂南流注于潁潁水又東南江陂水注之水受大漂陂陂水南流積為江陂南逕慎城西側城南流入于潁潁

水又逕慎縣故城南縣故楚邑白公所居以拒吳春

秋左傳哀公十六年吳人伐慎白公敗之王莽之慎

治也世祖建武中封劉賜為侯國潁水又東逕蜩螬

郭東俗謂之鄭城矣

一清按功臣侯表宣帝神爵三年封鄭吉為安遠侯表云慎縣

知此城為吉封邑也

又東南入于淮春秋昭公十二年楚子狩

于州來次于潁尾蓋潁水之會淮也

潁水出河南密縣西南馬領山

水出山下亦言出潁川陽城山

一清按此山在陽城是班固說

縣之東北蓋馬領之統目焉洧水東南流逕一故臺  
南俗謂之陽子臺又東逕馬領塢北塢在山上塢下  
泉流北注亦謂洧別源也而入於洧水洧水東流綏  
水會焉水出方山綏谿即山海經所謂浮戲之山也  
東南流逕漢宏農太守張伯雅墓塋域四周壘石為  
垣隅阿相降列於綏水之陰庚門表二石闕夾對石  
獸於闕下冢前有石廟列植三碑碑云德字伯雅河  
南密人也碑側樹兩石人有數石柱及諸石獸矣舊

引綏水南入瑩域而為池沼沼在丑地皆蟾蜍吐水  
石隍承溜池之南又建石樓石廟前又翼列諸獸但  
物謝時淪凋毀殆盡夫富而非義比之浮雲况復此  
乎王孫士安斯為達矣綏水又東南流逕上郭亭南  
東南注洧洧水又東襄荷水注之水出北山子節谿  
亦謂之子節水東南流注於洧洧水又東會瀝滴泉  
水出深谿之側泉流大餘懸水散注故世士以瀝滴  
稱南流入洧水也

又東南過其縣南

洧水又東南流與承雲二水合俱出承雲山二源雙導東南流注于洧世謂之東西承雲水洧水又東微水注之水出微山東北流入于洧洧水又東逕密縣故城南春秋謂之新城左傳僖公六年會諸侯伐鄭圍新密鄭所以不時城也今縣城東門南側有漢密令卓茂祠茂字子康南陽宛人溫仁寬雅恭而有禮人有認其馬者茂與之曰若非公馬幸至丞相府歸

我遂挽車而去後馬主得馬謝而還之任漢黃門郎  
遷密令舉善而教口無惡言教化大行道不拾遺蝗  
不入境百姓為之立祠享祀不輟矣洧水又左會瓌  
泉水水出王亭西北流注于洧洧水又東南與馬關  
水合水出王亭下東北流歷馬關謂之馬關水又東  
北注于洧洧水又東合武定水水北出武定岡西南  
流又屈而東南流逕零鳥塢西側塢東南流塢側有  
水懸流赴壑一匹有餘直注澗下淪積成淵嬉遊者

矚望竒為佳觀俗人覩此水掛于塢側遂目之為零  
鳥水東南流入于洧洧水又東與虎牘山水合水發  
南山虎牘谿東北流入洧洧水又東南赤澗水注之  
水出武定岡東南流逕皇臺下又歷岡東東南流注  
于洧洧水又東南流漕水注之洧水又東南逕鄒城  
南世本曰陸終娶於鬼方之妹謂之女隤朱氏謀，埤  
箋引世本  
作女是生六子孕三年啟其左脅三人出焉破其右  
脅三人出焉其四曰求言是為鄒人鄒人者鄭是也



一清按史記楚世家陸終生子六人四曰會人裴駟集解引世本曰會人者鄭是也鄭字誤當作鄒小司

馬索隱曰系本云四曰求言是為鄒人毛詩正義曰陸終生子六人四曰會人案世本會人即檜之祖也

鄭桓公問于史伯曰王室多難予安逃死乎史伯曰

虢鄆公之民遷之可也鄭氏東遷虢鄆獻十邑焉劉

楨云鄆在豫州外方之北北隣于虢都滎之南左濟

右洛居陽鄭雨水之間

全氏曰考潞洧之交並無陽水但有陰水耳左傳陰坂陰

口是也古文陽从陽陰从阴字近致訛

食潞洧焉徐廣曰鄆在密縣妘

姓矣不得在外方之北也洧水又東逕陰坂北水有

梁焉俗謂是濟為參辰口左傳襄公九年晉伐鄭濟  
于陰坂次于陰口而還是也杜預曰陰坂洧津也服  
虔曰水南曰陰口者水口也參陰聲相近蓋傳呼之  
謬耳又晉居商參之分實沈之土鄭處辰火之野闕  
伯之地軍師所次故濟得其名也

全氏曰按商參孫  
汝澄云當作商參

何焯曰非也參當作舉說文舉商星也非二十八宿  
之參唐韻讀作所中切予謂義門以說文立異而不  
細讀此注夫商星之舉何以亦為實沈之主乎且舉  
為晉分見于何書況善長引服氏語謂參陰聲相近  
今改而為所中切幾何不千里而遙也然則尚不如  
孫說之近是矣且善長此數語本屬傳會以晉為實

沈之土而軍師所次即以名其水口固未必然  
若鄭何嘗是閼伯之土乎此不足深辨者也

又東過鄭縣南潕水從西北來注之

洧水又東逕新鄭縣故城中左傳襄公元年晉韓厥

荀偃帥諸侯伐鄭入其郭敗其徒兵於洧上是也竹

書紀年晉文侯二年同惠王子多父伐鄭克之乃居

鄭父之丘名之曰鄭是曰桓公

一清按漢志河南郡新鄭縣應劭引國語

曰周幽王敗桓公死之其子武公與平王東遷洛邑  
遂伐虢儉而并其地而邑于此京兆尹鄭縣應劭曰

宣王母弟友所封也其子與平王東遷更稱新鄭史  
記鄭世家桓公初封于鄭索隱引系本云桓公居減

林徙拾宋忠曰減林與拾皆舊地名是封桓公乃名  
為鄭耳然則居鄭父之丘者是桓公之子武公而誤  
以為桓公者蓋竹書之繆皇甫士安帝王世紀云或  
遺元于渭水篇已詳辨之

言縣故有熊氏之墟黃帝之所都也鄭氏徙居之故  
曰新鄭矣城內有遺祠名曰章乘是也洧水又東為  
洧淵水春秋傳曰龍鬪於時門之外洧淵則此潭也  
今洧水自鄭城西北入而東南流逕鄭城南城之南  
門內舊外蛇與內蛇鬪內蛇死六年大夫傅瑕殺鄭  
子入厲公自是徵也水南有鄭莊公望母臺莊姜惡

公寤生與段京居段不弟姜氏無訓莊公居夫人于城潁誓曰不及黃泉無相見也故城臺以望母用仲在心之思感考叔之言忻大隧之賦洩洩之慈有嘉融融之孝得常矣洧水又東與黃水合經所謂漕水非也黃水出太山南黃泉東南流逕華城西史伯謂鄭桓公曰華君之土也韋昭曰華國名矣史記秦昭王三十三年白起攻魏拔華陽走芒卯斬首十五萬司馬彪曰華陽亭名在密縣嵇叔夜嘗采藥於山澤

學琴于古人即此亭也黃水東南流又與上水合水  
出兩塘中一源兩分泉流派別東為七虎澗水西流  
即是水也其水西南流注于黃水黃即春秋之所謂  
黃崖也故杜預云苑陵縣西有黃水者也又東南流  
水側有二臺也謂之積粟臺臺東即二水之會也捕  
獐山水注之水東出捕獐山西流注于黃水黃水又  
南至鄭城北東轉於城之東北與黃溝合水出捕獐  
山東南流至鄭城東北入黃水黃水又東南逕龍淵

泉東南七里溝水注之水出隙侯亭東南平地東注

又屈而南流逕升城東又其一

清按此處有脫誤

南歷燭城西

即鄭大夫燭之武邑也又南流注于洧水也

又東南過長社縣北

洧水東南流南濮北濮二水入焉洧水又東南與龍

淵水合水出長社縣西北有故溝上承洧水水盛則

通注龍淵水減則津渠輟流其瀆中滋泉南注東轉

為淵渌水平潭清潔澄深俯視游魚類若乘空矣所

謂淵無潛鱗也又東逕長社縣故城北鄭之長葛邑也春秋隱公五年宋人伐鄭圍長葛是也後社樹暴長故曰長社魏潁川郡治也余以景明中出宰茲郡於南城西側修立客館版築既興於土下得一樹根甚壯大疑是故社怪長暴茂者也稽之故說縣無龍淵水名蓋出近世矣京相璠春秋土地名曰長社北界有稟水但是水導於隍塹之中非北界之所謂又按京社地名並云長社縣北有長葛鄉斯乃縣徙于



南矣然則是水即稟水也其水又東南逕棘城北左傳所謂楚子伐鄭救齊次于棘澤者也稟水又東左注洧水洧水又東南分為二水也其枝水東北流注沙一水東逕許昌縣故許男國也姜姓四岳之後矣穆天子傳所謂天子見許男于洧上者也漢章帝建初四年更封馬光為侯國春秋佐助期曰漢以許昌失天下及魏承漢歷遂改名許昌也城內有景福殿基魏明帝太和中造準價八百餘萬洧水又東入汶

倉城內俗以是水為汶水故有汶倉之名非也蓋洧水之郕閤耳洧水又東逕僞陵縣故城南李奇曰六

國為安陵也昔秦求易地唐且受使於此春秋分記曰郕亦曰

陽陵成十六年晉敗楚于鄢陵即此六國時曰安陵兩漢晉為鄢陵縣俱屬潁川郡按後漢志曰春秋時

曰鄢注曰克段于鄢晉敗楚于鄢陵釋例亦然知其為鄭之鄢無疑惟是漢陳留郡有曰僞王莽所易為

順通在東漢屬梁國者是也應劭于前漢志誤以陳留之僞為克段之鄢水經據以為正謂克段于陽其

地在漢陳留杜預誤作潁川鄢陵蓋從應劭注耳此自應誤何得云杜誤乎一清按今本水經注浚儀渠

其一者東南過陳縣也下及睢水出梁郡僞縣卷中俱無克段之文克齋所引豈無明據耶蓋是書多缺

失耳寰宇記鄆城在宋州柘城縣北二十九里春秋時實陳株野地鄭伯克段之鄆在潁川不在陳留也

漢高帝十二年封都尉諸濞為侯國王莽更名左亭  
洧水又東僞陵陂水注之水出僞陵南陂東西南流  
注于洧水也

又東南過新汲縣東北

洧水自僞陵東逕桐丘南俗謂之天井陵又曰岡非  
也洧水又屈而南流水上有梁謂之桐門橋蓋藉桐  
丘以取稱亦言取桐門亭而目焉然不知亭之所在

未之詳也洧水又東南逕桐丘城春秋左傳莊公二十八年楚伐鄭鄭人將奔桐丘即此城也杜預春秋釋地曰潁川許昌城東北京相璠曰鄭地也今國無而城見存西南去許昌故城可三十五里俗名之曰隄其城南即長隄固洧水之北防也西面桐丘其城邪長而不方蓋憑丘之稱即城之名矣洧水又東逕新汲縣故城北漢宣帝神爵二年置於許之汲鄉曲洧城以河內有汲縣故加新也漢章帝建初四年封

執金吾馬光為侯國

沈氏曰按後漢書本傳馬光無新汲之封而建初四年所封即

許昌也已見上

大城在洧水南隄上又東洧水右迤

為獲陂洧水又逕匡城南扶溝之匡亭也又東洧水

左迤為鴨子陂謂之大穴口也

又東南過茅城邑之東北

洧水自大穴口東南逕洧陽城西南逕茅城東北又

南左合甲庚溝溝水上承洧水於大穴口東北枝分

東逕洧陽故城南俗謂之復陽城非也蓋洧復字類

音讀變漢建安中封司空祭酒郭奉孝為侯國其水  
又東南為鴨子陂陂廣一十五里餘波南入甲庚溝  
西注洧東北瀉沙洧水又東逕一故城西世謂之思  
鄉城西去洧十五里洧水又右合獲陂水上承洧水  
於新汲縣南逕新汲縣故城東又南積而為陂陂之  
西北即長舍城全氏曰長舍即長社之變陂水東翼洧隄西面茅  
邑自城北門列築隄道迄于此岡世尚謂之茅岡即  
經所謂茅城邑也陂水北出東入洧津西納渙流

又東過習陽城西折入于潁

洧水又東南逕辰亭東俗謂之田城非也蓋田辰聲相近城亭音韻聯故也經書魯宣公十一年楚子陳侯鄭伯盟于辰陵也京相璠曰潁川長平有故辰亭杜預曰長平縣東南有辰亭今此城在長平城西北長平城在東南或杜氏之謬傳書之誤耳長平東南淋陂北畔有一阜東西減里南北五十許步俗謂之新亭臺又疑是杜氏所謂辰亭而未之詳也洧水又

南逕長平縣故城西王莽之長正也洧水又南分為  
二水枝水東出謂之五梁溝逕習陽城北又東逕赭  
丘南丘上有故城郡國志曰長平故屬汝南縣有赭  
丘城即此城也又東逕長平城南東注潞陂洧水南  
出謂之雞籠水故水會有籠口之名矣洧水又東逕  
習陽城西南折入潁地理志曰洧水東南至長平  
縣入潁者也

潁水出河南密縣大騄山



大駝即具茨山也黃帝登具茨之山升于洪隄之上  
受神芝圖於黃蓋童子即是山也潞水出其阿流而  
為陂俗謂之玉女池東逕陘山北史記魏襄王六年  
敗楚於陘山者也山上有鄭祭仲冢冢西有子產墓  
累石為方墳墳東有廟並東北向鄭城杜元凱言不  
忘本際廟舊有一枯柏樹其廕根故株之上多生稚  
柏列秀青青望之奇可嘉矣潞水又東南逕長社縣  
故城西北南潞北潞二水出焉劉澄之著永初記云

水經濮水源出大魏山東北流注泗衛靈聞音於水上殊為乖矣余按水經為濮水不為濮也是水首受濮水川渠雙引俱東注有洧與之過沙枝流派亂牙得通稱是以春秋昭公九年遷城父人於陳以夷濮西田益之京相璠曰以夷之濮西田益也杜預亦言以夷田在濮水西者與城父人服虔曰濮水名也且字類音同津澗邈別不得為北濮上源師氏傳音於其上矣濮水又南逕鐘亭西又東南逕王亭西又東

南逕闕亭西又東南逕宛亭西鄭大夫宛射犬之故  
邑也潁水又南分為二水一水南出逕胡城東故潁  
縣之狐人亭也其水南結為陂謂之胡城陂潁水自  
枝渠東逕曲強城東皇陂水注之水出西北皇臺七  
女岡北皇陂即古長社縣之濁澤也史記魏惠王元

年韓懿侯與趙成侯合軍伐魏戰于濁澤是也

方輿紀要

云濁澤括地志云出解縣東北平地即潁水也潁音濁史記趙成侯六年戊魏取潁澤又魏世家魏惠王元年韓懿侯趙成侯合兵伐魏戰于濁澤大破之遂圍魏是時魏都安邑或以為河南之濁澤誤也一清

按史記韓世家注云徐廣曰其陂水寰宇記尉氏縣長社有濁澤鄆說蓋有所據下引水經注云

魏惠王元年韓懿侯會伐魏于島澤陂北對雞鳴城一清按其陂水下疑有脫誤北對雞鳴

城即長社縣之濁城也陂水東南流逕胡泉城北故

潁陰縣之狐宗鄉也又東合胡城陂水水上承皇陂

水而東南流注于黃水謂之合作口而東逕曲強城

北東流入潁水時人謂之勑水非也勑潁音相類故

字從聲變耳一清按說文潁水出河南密縣大隗山南入潁从水異聲與職切與水經合又

有潁水出河南密縣東入潁从水翼聲與職切潁漢音同而字相近其源委又同豈即一水而重出者與

惟其為與職切故與勅音異相去遠矣  
潁水又逕東西二武亭間

兩城相對疑即古之岑門史遷所謂走犀首於岑門

者也徐廣曰潁陰有岑亭未知是否

沈氏曰續志潁陰縣有岸門史

記魏世家哀王五年走犀首于岸門徐廣曰潁陰有岸亭張守節曰括地志云岸門在長社縣西北二十

八里今名西武亭然則岑字誤也索隱引劉昭曰河東皮氏縣有岸頭亭蓋為謬矣一清按漢書衛青傳

張次公封岸頭侯晉灼曰河東皮氏亭也顧景范曰岸頭亭在河津縣南古岸門也史記秦孝公二十四

年與晉戰于岸門虜其將魏錯又惠文王後十一年敗韓于岸門斬首十萬魏世家襄王五年秦使樗里

子代取我曲沃走犀首于岸門今河津漢皮潁水又氏縣地與曲沃近河東亦有岸門因致斯誤  
潁水又

南逕射犬城東即鄭公孫射犬城也蓋俗謬耳潁水  
又南逕潁陰縣故城西魏明帝封司空陳羣為侯國  
其水自城西又東逕許昌城南又東南與宣梁陂水  
合陂水上承狼陂於潁陰城西南陂南北二十里東  
西十里春秋左傳曰楚子伐鄭師于狼淵是也其水  
東南入許昌縣逕巨陵城北鄭地也春秋左氏傳莊  
公十四年鄭厲公獲傅瑕于大陵京相璠曰潁川臨  
潁縣東北二十五里有故巨陵亭古大陵也其水又

東積而為陂謂之宣梁陂也陂水又東南入潁水潁水又西南流逕陶城西又東南逕陶陂東

東南入于潁

潁水出鄭縣西北平地

全氏曰按潁水說文以出桂陽臨武者當之而水經注水篇亦

有出平輿之潁水若其出鄭縣者說文以為潁水其音如潁其字不作潁也不知何時盡毛詩左傳國語孟子史漢諸書之潁胥改為潁猶幸水經存其舊稍留說文之學

潁水出鄆城西北雞絡塢下東南流逕賈復城西東南流左合潁水水出賈復城東南流注于潁潁水又

南左會承雲山水水出西北承雲山東南歷渾子岡  
東注世謂岡峽為五鳴口東南流注于潯潯水又東  
南流歷下田川逕鄒城西謂之為柳泉水也故史伯  
答桓公曰君以成周之衆奉辭伐罪若剋虢鄒君之  
土也如前華後河左洛右濟主芣騶而食潯洧修典  
刑以守之可以少固即謂此矣潯水又南懸流奔壑  
崩注丈餘其下積水成潭廣四十許步淵深難測又  
南注于洧

全氏曰按潯水不得入洧道元已詳辨之則此注洧之說為非矣

詩所謂



漆與洧者也世亦謂之為鄆水也

春秋分記曰鄭之漆水故儉國居之

亦曰儉水是也

東過其縣北又東南過其縣東又南入于洧水

自鄆溜東南更無別瀆不得逕新鄭而會洧也鄭城東入洧者黃崖水也蓋經誤證耳

一清按此條又不錯未知上何以有

注洧之說

渠出滎陽北河東南過中牟縣之北

風俗通曰渠者水所居也渠水自河與泐亂流東逕

滎澤北東南分涕歷中牟縣之圃田澤北與陽武分  
水澤多麻黃草故述征記曰踐縣境便覩斯卉窮則  
知踰界今雖不能然諒亦非謬詩所謂東有圃草也  
皇武子曰鄭之有原圃猶秦之有具囿澤在中牟縣  
西西限長城東極官渡北佩渠水東西四十許里南  
北二百許里中有沙岡上下二十四浦津流逕通淵  
潭相接各有名焉有大斬小斬大灰小灰義魯練秋  
大白楊小白楊散嚇禺中羊圈大鵠小鵠龍澤密羅

大哀小哀大長小長大縮小縮伯丘大蓋牛眠等浦  
水盛則北注渠溢則南播故竹書紀年梁惠成王十  
年入河水于甫田又為大溝而引甫水者也又有一  
瀆自酸棗受河導自漢瀆歷酸棗逕陽武縣南出世  
謂之十字溝而屬於渠或謂是瀆為梁惠之年所開  
而不能詳也斯浦乃水澤之所鍾為鄭陞之淵藪矣  
渠水右合五池溝上承澤水下流入渠為之五池口  
魏嘉平三年司馬懿帥中軍討太尉王淩於壽春自

彼而還帝使侍中韋誕勞軍于五池者也今其地為  
五池鄉矣渠水又東不家溝水注之水出京縣東南  
梅山北谿春秋襄公十八年楚為子馮公子格率銳  
師侵費右迴梅山杜預曰在密東北即是山也其水  
自谿東北流逕管城西故管國也周武以封管叔矣  
成王幼弱周公攝政管叔流言曰公將不利于孺子  
公賦鴟鴞以伐之即東山之師是也左傳宣公十二  
年晉師救鄭楚次管以待之杜預曰京縣東北有管

城者是也俗謂之為管水又東北分為二水一水東  
北流注黃雀溝謂之黃淵淵周一百步其一水東越  
長城東北流水積為淵南北二里東西百步謂之百  
尺水北入圃田澤分為二水一水東北逕東武強城  
北漢書曹參傳擊羽嬰于昆陽追至葉還攻武強因  
至滎陽薛瓚云按武強城在陽武縣即斯城也漢高  
帝六年封騎將莊不識為侯國又東北流左注于渠  
為不家水口也一水東流又屈而南轉東南注白溝

也渠水又東清池水注之清池水出清陽亭西南平地東北流逕清陽亭南東流即古清人城也詩所謂清人在彭彭為高克邑也故杜預春秋釋地云中牟縣西有清陽亭是也清池水又屈而北流至清口澤七虎澗水注之水出華城南岡一源兩派津川趣別西入黃雀溝東為七虎谿亦謂之為華水也又東北流紫光溝水注之水出華陽城東北而東流俗名曰紫光澗又東北注華水華水又東逕裴城北即北林

亭也春秋文公與鄭伯宴于棐林子家賦鴻雁者也  
春秋宣公元年諸侯會于棐林以伐鄭楚救鄭遇于  
北林服虔曰北林鄭南地也京相璠曰今滎陽苑陵  
縣有故林鄉在新鄭北故曰北林也余按林鄉故城  
在新鄭東北如北七十許里苑陵故城在東南五十  
許里不得在新鄭北也考京服之說並為疎矣杜預  
云滎陽中牟縣西南有林亭在鄭北今是亭南去新  
鄭縣故城四十許里蓋以南有林鄉亭故杜預據是

為北林最為密矣又以林鄉為裴亦或疑焉諸侯會  
裴楚遇于此寧得知不在是而更指他處也積古之  
傳事或不謬矣又東北逕鹿臺南岡北出為七虎澗  
東流期水注之水出期城西北平地世號龍淵水東  
北流又北逕期城西又北與七虎澗合謂之虎谿水  
亂流東注逕期城北東會清口水司馬彪郡國志曰  
中牟有清口水即是水也清水又東北白溝水注之  
水有二源北水出密之梅山東南而東逕靖城南與



南水合南水屈合太水西北流至靖城南左注北水  
即承水也山海經曰承水出太山之陰東北流注于  
沒水者也世謂之靖澗水也又東北流太水注之水  
出太山東平地山海經曰太水出于太山之陽而東  
南流注于沒水世謂之禮水也東北逕武陵城西東  
北流注于承水又東北入黃瓮澗北逕中陽城西城  
內有舊臺甚秀臺側有陂池池水清深澗水又東屈  
逕其城北竹書紀年梁惠成王十七年鄭釐侯來朝

中陽者也其水東北流為白溝又東北逕伯禽城北  
蓋伯禽之魯往逕所由也屈而南流東注于清水即  
潘岳都鄉碑所謂自中年故縣以西至于清溝指  
是水也亂流東逕中年宰魯恭祠南漢和帝時右扶  
風魯恭字仲康以太尉掾遷中年令政專德化不任  
刑罰吏民敬信蝗不入境河南尹袁安疑不實使部  
掾肥親按行之恭隨親行阡陌坐桑樹下雉止其傍  
有小兒親曰兒何不擊雉曰將雛親起曰蟲不入境

一異化及鳥獸二異豎子懷仁三異久留非優賢請  
還是年嘉禾生縣庭安美其治以狀上之徵博士侍  
中車駕每出恭常陪乘上顧問民政無所隱諱故能  
遺愛自古祠饗來今矣清溝水又東北逕沈清

一清按沈

清下疑脫亭字疑即博浪亭也服虔曰博浪陽武沙水二名

也今有亭

一清按漢書張良傳注引服虔曰博浪河而陽武南地名今有亭史記索隱曰服虔

云博浪地名在陽武南而晉志滎陽郡卷縣下云有博浪長沙道元既以博浪為澤水所鍾又是長沙故

云沙水二名但所引服說所未詳也歷博浪澤昔張全與史漢注異未知所據

良為韓報仇於秦以金椎擊秦始皇不中中其副車  
於此又北分為二水枝津東注沒水清水自枝流北  
注渠謂之清溝口渠水又左逕陽武縣故城南東為  
官渡水又逕曹太祖壘北有高臺謂之官渡臺渡在  
中年故世又謂之中年臺建安五年太祖營官渡袁  
紹保陽武紹連營稍前依沙堆為屯東西數十里公  
亦分營相禦合戰不利紹進臨官渡起土山地道以  
逼壘公亦起高臺以捍之即中年臺也今臺北土山

猶在山之東悉紹舊營遺基並存渠水又東逕田豐祠北袁本初慙不納其言害之時人嘉其誠謀無辜見戮故立祠於是用表袁氏覆滅之宜矣又東役水

注之水出苑陵縣西隙侯亭東世謂此亭為郟城非

也蓋隙郟聲相近耳

沈氏曰左傳襄公十一年諸侯之師次于瑯杜註苑陵縣西有

瑯侯亭續志苑陵縣有瑯侯亭若隙是隙字不與瑯通考字書瑯與瑯通或是瑯字之誤文

中平

陂

一清按中平陂上有脫文

世名之渥泉也即古役水矣山海經

曰役山役水所出北流注于河疑是水也東北流逕

苑陵縣故城北東北流逕焦城東陽丘亭西世謂之  
焦溝水竹書紀年梁惠成王十六年秦公孫壯率師  
伐鄭圍焦城不剋卽此城也俗謂之驛城非也役水  
自陽丘亭東逕山氏城北為高榆淵竹書紀年梁惠  
成王十六年秦公孫壯率師城上枳安陵山氏者也  
又東北為酢溝又東北魯溝水出焉役水又東北渥  
溝水出焉又東北為八大溝又東清水枝津注之水  
自沈城東派注于役水又東逕曹公壘南東與沫水

合山海經云末山沫水所出北流注于役今是水出  
中牟城西南疑卽沫水也東北流逕中牟縣故城南

昔趙獻侯自耿都此班固云趙自邯鄲徙焉趙襄子

時佛肸以中牟叛置鼎於庭不與已者烹之田英朱氏

謀璋箋云說苑作田基新序作田卑將寨裳赴鼎處也薛瓚注漢書云

中牟在春秋之時為鄭之堰也及三卿分晉則在魏

之邦土趙自漳北不及此也春秋傳曰衛侯如晉過

中牟非衛適晉之次也汲郡古文曰齊師伐趙東鄙

圍中牟此中牟不在趙之東也按中牟當作濕水之  
北矣按春秋齊伐晉夷儀晉車千乘在中牟衛侯過  
中牟中牟人欲伐之衛褚師固亡在中牟曰衛雖小  
其君在未可勝也齊師剋城而驕遇之必敗乃敗齊  
師服虔不列中牟所在杜預曰今滎陽有中牟迴遠  
疑為非也然地理參差土無常域隨其疆弱自相吞  
併疆理留移寧可一也兵車所指逕紆難知自魏徙  
大梁趙以中牟易魏故趙之南界極于浮水匪直專



漳也趙自西取後止中牟齊師伐其東鄙於宜無嫌

而瓚但逕濕水空言中牟所在非論證也

全氏曰有河南之中

牟有河北之中牟張守節以鄴西牟山為趙中牟者近之管子所謂葉五鹿中牟鄴者三城相接也然則

非獨滎陽有之矣一清案春秋定九年傳晉車千乘在中牟杜預曰今滎陽有中牟縣逕遠疑非也孔穎

達正義曰此中牟在晉竟內也趙世家云獻侯即位治中牟漢書地理志云河南郡有中牟縣趙獻侯自

耿徙此又云三家分晉河南之中牟魏分也杜言今滎陽有中牟縣謂此河南之中牟也晉世分河南為

滎陽郡中牟屬焉此地乃在河南計非晉竟故云逕遠疑非也又三家分晉中牟屬魏則非趙得都之趙

獻侯治中牟亦非河南之中牟也此言晉車在中牟哀五年趙鞅伐衛園中牟論語佛肸為中牟宰與趙

獻侯所都或當是一地必非河南中牟當于河北別  
有中牟但不復知其處耳有臣瓚者不知其姓或云  
姓傅作漢書音義云臣瓚案河南中牟春秋之時在  
鄭之疆內及三卿分晉則為魏之邦土趙界自漳水  
以北不及此也春秋衛侯如晉過中牟案此中牟非  
衛適晉之次也汲郡古文曰齊師伐趙東鄙圍中牟  
此中牟不在趙之東也案中牟當在溫水之上瓚言  
河南中牟非此中牟誠如其語謂此中牟當在溫水  
之上不知其所案據也溫水宜是濟漯之漯此為文  
誤方輿紀要中牟城在湯陰縣西五十里此即河北  
之中牟也漢高帝十一年封單父聖為侯國一清按漢表  
作單右車此

從史表

沫水又東北注于役水昔魏太祖之背董卓也

間行出中牟為亭長所錄郭長公世語為縣所拘清一

按九字注中功曹請釋焉役水又東北逕中牟澤即鄭太

叔攻荏蒲之盜於是澤也其水東流北屈注渠水續  
述征記所謂自醬魁城到酢溝十里者也渠水又東  
流而左會淵水其水上承聖女陂陂周二百餘步水  
無耗竭湛然清滿而南流注于渠渠水又東南而注  
大梁也

又東至浚儀縣

渠水東南逕赤城北戴延之所謂西北有大梁亭非

也竹書紀年梁惠成王二十八年穰苴

朱氏謀埠箋曰今竹書作

穰

率師及鄭孔夜戰于梁赫鄭師敗逋即此城也左

則故瀆出焉秦始皇二十年王賁斷故渠引水東南

出以灌大梁謂之梁溝又東逕大梁城南本春秋之

陽武高陽鄉也於戰國為大梁周梁伯之居矣梁伯

好土功大其城號曰新里民疲而潰秦遂取焉後魏

惠王自安邑徙都之故曰梁耳竹書紀年梁惠成王

六年四月甲寅徙都于大梁是也

日知錄曰左傳桓九年梁伯伐曲沃

註梁國在馮翊夏陽縣郤芮曰梁近秦而幸焉是也  
漢書地理志云馮翊夏陽故少梁也水經注乃誤以  
少梁為大梁而不知大梁不近秦也後漢志河南尹  
梁故國伯翳後註引博物記云梁伯好土功今梁多  
有城亦誤全氏曰少梁是晉邑即梁益耳所食采也  
漢志河南郡梁縣臣瓚曰此梁周之小邑見于春秋  
蓋即指楚人侵梁及霍之梁在戰國為南梁蓋大梁  
在浚儀少梁在夏陽南梁在汝水之傍三梁不可混  
也秦滅魏以為縣漢文帝封孝王于梁孝王以土地

下涇東都睢陽又改曰梁自是置縣以大梁城廣居  
其東城夷門之東夷門即侯羸抱關處也續述征記  
以此城為師曠城言郭緣生曾遊此邑踐夷門升吹

臺終古之跡緬焉盡在余謂此乃梁氏之臺門魏惠  
之朝居非吹臺也當是誤證耳西征記論語儀封人  
即此縣又非也竹書紀年梁惠成王三十一年三月  
為大溝于北郭以行圃田之水陳留風俗傳曰縣北  
有浚水像而儀之故曰浚儀余謂故汴沙為陰溝矣  
浚之故曰浚其猶春秋之浚沫乎漢氏之浚儀水無

佗也皆變名矣

一清按顧景范曰詩爰有寒泉在浚之下志云今祥符縣西三十里有寒

泉陂即詩所稱浚水為汴所奪故汴水經大梁北亦  
為浚水之名蓋不始於漢氏也浚城寒泉岡亦見

注其國多池沼時池中出神劍到今其民像而作之  
號大梁氏之劍也渠水又北屈分為二水續述征記  
曰汴沙到浚儀而分也汴東注沙南流其水東南流  
逕梁王吹臺東陳留風俗傳曰縣有倉頡師曠城上  
有列仙之吹臺北有牧澤中出蘭蒲土多僞髦衿帶  
牧澤方一十五里俗謂之蒲闕澤即謂此矣梁主增  
築以為吹臺城隍夷滅略存故迹今層臺孤立於牧  
澤之右矣其臺方一百許步即阮嗣宗詠懷詩所謂

駕言發魏都南向望吹臺簫管有遺音梁王安在哉  
晉世喪亂乞活居削隳故基遂成二層上基猶方  
四五十步高一丈餘世謂之乞活臺又謂之婆臺城

一清按文昌錄繁臺梁孝王按歌吹之臺後有繁  
氏居其側里人呼為繁臺繁婆音相近即婆臺也日

知錄建昭三年七月戊辰衛府李延壽為御史大夫  
一姓繁師古曰繁音蒲胡反蕭望之傳師古音婆谷永傳

壽師古曰繁音蒲胡反蕭望之傳師古音婆谷永傳  
師古音婆何反蒲元則音盤蒲胡則音蒲蒲何則音

婆三音互見並未歸一然繁字似有蒲音左傳定四  
年殷民七族繁音步何反儀禮鄉射禮注今文皮樹

為繁豎皮古音婆史記張丞相世家丞司直繁君索  
隱曰繁音婆文選繁休伯呂句音步何反則繁之音



婆相渠水  
子傳久矣

此有陰溝鴻溝之稱焉項羽與漢高分王

指是水以為東西之別故蘓秦說魏襄王曰大王之

地南有鴻溝是也故尉氏縣有波鄉波亭鴻溝鄉鴻

溝亭皆藉水以立稱也今蕭縣西亦有鴻溝亭梁國

睢陽縣東有鴻口亭先後談者亦指此以為楚漢之

分王非也蓋春秋之所謂紅澤者矣

一清按善長之  
辨非楚漢分畫

之鴻溝是矣其言春秋之紅  
澤則非也說見獲水注中

渠水右與汜水合水上

承役水于苑陵縣縣故鄭都也王莽之左亭縣也役

水枝津東派為汜水者也而世俗謂之渥溝水也春

秋左傳僖公三十年晉侯秦伯圍鄭晉軍函陵秦軍

汜南所謂東汜者也其水又東北逕中牟縣南又東

北逕中牟澤

一清按漢志河南郡中牟縣下云  
圃田澤在西豫州數即是澤也

與淵

水合水出中牟縣故城北城有層臺按郭頒世語及

干寶晉紀並言中牟縣故魏任城王臺下池中有漢

時鐵錐長六尺入地三尺頭西南指不可動至月朔

自正以為晉氏中興之瑞而今不知所在或言在中

陽城池臺未知焉是淵水自池西出屈逕其城西而

東南流注于汜汜水又東逕大梁亭南又東逕梁臺

南東注渠渠水又東南流逕開封縣睢渙二水出焉

右則新溝水注之其水出逢池

一清按漢志河南郡開封縣下云逢池在

東北或曰宋之逢澤也臣瓚曰汲郡古文梁惠王發逢忌之藪以賜民今浚儀有逢陂忌澤是也池

上承役水于苑陵縣別為魯溝水東南流逕開封縣

故城北漢高帝十一年封陶舍為侯國也陳留志稱

阮簡字茂宏為開封令縣側有劫賊外白甚急數阮

方圍棋長嘯吏云劫急阮曰局上有劫亦甚急其耽樂如是故語林曰王中郎以圍棋為坐隱或亦謂之為手談又謂之為棋聖魯溝南際富城東南入百尺

陂即古之逢澤也徐廣史記音義曰秦孝公會諸侯

于逢澤陂汲郡墓竹書紀年作逢澤

一清按史記秦本紀孝公十九

年會諸侯逢澤徐廣曰開封東北有逢澤不如鄭所云

斯其處也故應德璉西

征賦曰鸞衡東指弭節逢澤其水東北流為新溝新溝又東北流逕牛首鄉北謂之牛建城又東北注渠

即沙水也音祭許慎正作沙音言水散石也從水少

水沙見矣

一清按二十  
字注中注

楚東有沙水謂此水也

又屈南至扶溝縣北

沙水又東南逕牛首鄉東南魯渠水出焉亦謂之宗

溝也又逕陳留縣故城南孟康曰留鄭邑也後為陳

所并故曰陳留矣魯溝水又東南逕圉縣故城北縣

苦楚難修其干戈以圉其患故曰圉也或曰邊陲之

號矣歷萬人散王莽之篡也東郡太守翟義興兵討

莽莽遣奮威將軍孫建擊之于圍北義師大敗尸積

萬數血流溢道號其處為萬人散百姓哀而祠之清

按郡國志圍有高陽亭劉昭補註引陳留志云有萬人聚王邑破翟義積尸處今高陽文潁曰聚邑名

又歷魯溝亭又東南至陽夏縣故城西漢高祖六年

封陳豨為侯國魯溝水又南入渦一清按漢志陳留郡陳留縣魯渠水

首受狼蕩渠東至陽夏縣入今無水也沙水又東南渦正國語所謂商魯之溝也

逕斗城西左傳襄公三十年子產殯伯有尸其臣葬

之於是城也沙水又東南逕牛首亭東左傳桓公十

四年宋人與諸侯伐鄭東郊取牛首者也俗謂之車牛城矣沙水又東南八里溝水出焉又東南逕陳留縣裴氏鄉裴氏亭西又逕澹臺子羽冢東與八里溝合按陳留風俗傳曰陳留縣裴氏鄉有澹臺子羽冢又有子羽祠民祈禱焉京相璠曰今泰山南武城縣有澹臺子羽冢縣人也未知孰是因其方誌所叙就記纏絡焉溝水上承沙河而西南流逕牛首亭南與百尺陂水合其水自陂南逕開封城東三里岡左屈

而西流南轉注八里溝又南得野兔水口水上承西南兔氏亭北野兔陂鄭地也春秋傳云鄭伯勞屈生于兔氏者也陂水東北入八里溝八里溝水又南逕石倉城西又南逕兔氏亭東又南逕召陵亭西東入沙水沙水南逕扶溝縣故城東縣即潁川之穀平鄉也有扶亭又有洧水溝故縣有扶溝之名焉建武元年漢光武封平狄將軍朱鮪為侯國沙水又東與康溝水合水首受洧水於長社縣東東北逕向岡西即



鄭之向鄉也後人遏其上口今水盛則北注水耗則輟流又西長明溝水注之水出苑陵縣故城西北縣有二城此則西城也二城以東悉多陂澤即古制澤也京相璠曰鄭地杜預曰澤在滎陽苑陵縣東即春秋之制田也故城西北平地出泉謂之龍淵泉淵水流逕陵丘亭西又西重泉水注之水出城西北平地泉湧南流逕陵丘亭西西南注龍淵水龍淵水又東南逕凡陽亭西而南入白雁陂陂在長社縣東北東

西七里南北十里在林鄉之西南司馬彪郡國志曰

苑陵有林鄉亭

一清按今續志無是文劉昭補註于苑陵縣下引杜預曰縣東南有林鄉

白雁陂又引瀆南流謂之長明溝東轉北屈又東逕

向城北城側有向岡左傳襄公十一年諸侯伐鄭師

于向者也又東右迤為染工陂而東注于蔡澤陂長

明溝水又東逕尉氏縣故城南園稱云尉氏鄭國之

東鄙樊獄官名也鄭大夫尉氏之邑故樂盈曰盈將

歸死于尉氏也

全氏曰樂孺子所對周尉氏之官也善長以此証鄭尉氏之邑則誤矣

溝瀆自是三分北分為康溝東逕平陸縣故城北高

后元年封楚元王子禮為侯國

全氏曰按本表是景帝所封索隱云西河

又云東平陸在東平胡三省曰東平近楚為得之

建武元年以戶不滿三千

罷為尉氏縣之陵樹鄉又有陵樹亭漢建安中封尚

書荀攸為陵樹鄉侯故陳留風俗傳曰陵樹鄉故平

陸縣也

一清按漢志陳留郡無平陸縣也劉昭續志補註于尉氏縣下引陳留志云有陵樹鄉則

東京廢省之說有如鄆北有大澤名曰長樂廐

按一清吉抑或班固之失記耳

昭補註尉氏縣下引陳留志曰北有大澤澤有天子苑有長樂廐漢諸帝以馴養猛獸然則廐非澤名善

長誤矣

康溝水又東逕扶溝縣之白亭北陳留風俗傳

曰扶溝縣有帛鄉帛亭名在七鄉十二亭中康溝水

又東逕少曲亭陳留風俗傳曰尉氏縣有少曲亭俗

謂之為小城也又東南逕扶溝縣故城東而東南注

沙水沙水又南會南水其水南流又分為二水一水

南合闕亭東又東南流與左水合其水自枝瀆南逕

召陵亭西疑即扶溝之亭也而東南合右水世以是

水與僞陵陂水雙導亦謂之雙溝又東南入沙水沙

水南與蔡澤陂水合水自僞陵城西北春秋成公十六年晉楚相遇于僞陵呂錡射中共王目王召養由基使射殺之亦子反醉酒自斃處也陂東西五里南北十里陂水東逕匡城北城在新汲縣之東北即扶溝之匡亭也亭在匡城鄉春秋文公元年諸侯朝晉衛成公不朝使孔達侵鄭伐綿訾及匡即此邑也今陳留長垣縣南有匡城即平丘之匡亭也襄邑又有承匡城然匡居陳衛之間亦往往有異邑矣陂水又

東南至扶溝城北又東南入沙水沙水又南逕小扶

城西南流也城即扶溝縣之平周亭東漢和帝永元

中封陳敬王子參為侯國沙水又東南逕大扶城西

城即扶鄉故縣也城北二里有袁梁碑云梁陳國扶

樂人

隸釋漢國三老袁君碑云君諱良字厚卿陳國扶樂人也洪氏适曰碑在開封之扶溝袁君名

良歷郎中謁者將作大匠丞相令史廣陵太守議郎符節令國三老梁相以順帝永建六年卒其孫衛尉

滂立此石滂以光武年為相其作九卿當在靈帝之初水經云扶溝有袁梁碑者誤也一清按袁君名良

碑字作據無可疑者鄺注作梁良梁音同後漢世祖互用左傳季梁潏水注作季良亦其類也

建武十七年更封劉隆為扶樂侯即此城也渦水於是分焉不得在扶溝北便分為二也

其一者東南過陳縣北

沙水又東南逕東華城西又東南沙水枝瀆西南達洧謂之甲庚溝今無水沙水又南與廣漕渠合上承龐官陂云鄧艾所開也雖水流廢興溝瀆尚夥昔賈逵為魏豫州刺史通運渠二百里餘亦所謂賈侯渠

平縣故城北又東南逕陳城北故陳國也伏羲神農  
並都之城東北三十許里猶有羲神實中舜後媯滿  
為周陶王武王賴其器用妻以元女太姬而封諸陳  
以備三恪太姬好祭祀故詩所謂坎其擊鼓宛丘之  
下宛丘在陳城南道東王隱云漸欲平今不知所在  
矣楚討陳殺夏徵舒於栗門以為夏州後一清按此下有缺文  
蓋叙楚莊王因申叔時之言而復封陳也然云楚討  
陳以為夏州則尚有不合者左氏傳曰因縣陳又曰  
乃復封陳鄉取一人焉以歸謂之夏州孔氏正義曰  
謂之夏州者討夏氏鄉取一人以歸楚而成一州故



謂之夏州蓋未嘗以陳為夏州也

城之東門內有池池水東西七十

步南北八十步其水至清潔而不耗竭不生魚草水

中有故臺處詩所謂東門之池也城內有漢相王君

造四縣邸碑文字剝落不可悉識其略曰唯茲陳國

故曰淮陽郡云云

一清按漢志淮陽是國名王君清不知此碑何以有郡稱也

惠著聞為百姓畏愛求賢養士千有餘人賜與田宅

吏舍自捐俸錢助之成邸五官掾西華陳騏等二百

五人以延熹二年云云故其頌曰修德立功四縣回

附今碑之左右遺墉尚存基礎猶在時人不復尋其碑證云孔子廟學非也後楚襄王為秦所滅徙都於此文穎曰西楚矣三楚斯其一焉城南郭裏又有一城名曰淮陽城子產所置也漢高祖十一年以為淮陽國王莽更名新平縣曰陳陵故豫州治王隱晉書地道記云城北有故沙名之為死沙而今水流津通漕運所由矣沙水又東而南屈逕陳城東謂之百尺溝又南分為二水新水出焉溝水東南流谷水注之

水源上承潞陂陂在陳城西北南暨犖城皆為陂矣  
陂水東流謂之谷水東逕犖城北王隱曰犖北有谷  
水是也犖即檜矣經書公會齊宋于檜者也杜預曰  
檜即犖也在陳縣西北為非檜小城也在陳郡西南  
谷水又東流逕陳城南又東流入于沙沙水又東南  
流注于潁謂之交口水次有大堰即古百尺堰也魏  
書國志曰司馬宣王討太尉王凌大軍掩至百尺塢  
即此塢也今俗呼之為山陽堰非也蓋新水首受潁

於百尺溝王莽名郡為新平

一清按此文與上複出

故堰兼有

新陽之名也以是推之悟故俗謂之非矣

又東南至汝南新陽縣北

沙水自百尺溝東逕寧平縣之故城南晉陽秋稱晉

太傅東海王越之東奔也石勒追之殯尸於此數十

萬眾歛手受害勒縱騎圍射尸積如山王夷甫死焉

余謂俊者所以智勝羣情辨者所以文身祛惑夷甫

雖體荷雋令口擅雌黃汗辱君親獲罪羯勒史官方

之華王諒為褒矣沙水又東積而為陂謂之陽都陂  
明水注之水上承沙水枝津東出逕汝南郡之宜祿  
縣故城北王莽之賞都亭也明水又東北流注于陂  
陂水東南流謂之細水又東逕新陽縣北又東高陂  
水東出焉沙水又東分為二水即春秋所謂夷濮之

水也

一清按春秋無夷濮之水之名杜預曰此時改  
城父為夷又云夷田在濮水西道元所引前後

殆自相  
伐也

枝津北逕譙縣故城西側城入渦沙水東南

逕城父縣西南枝津出焉俗謂之漳水也一水東注

即濮水也俗謂之父水也東逕城父縣之故城東南  
流注之

又東南過山桑縣北


山桑故城在渦水北沙水不得逕其北明矣經言過  
北誤也

又東南過龍亢縣南

沙水逕故城北又東南逕白鹿城北而東注也

又東南過義城縣西南入于淮

義城縣故屬沛後隸九江沙水東流注于淮謂之沙  
汭京相璠曰楚東地也春秋左傳昭公二十七年楚  
令尹子常以舟師及沙汭而還杜預曰沙水名也



水經注釋卷二十二